

小  
草  
齋  
集

小草齋集卷之八

陳留謝肇淛著

友人王 宇校

七言古詩一

少年行

貴不必上將軍富不必黃金穴  
春風一騎金蓮錢踏遍長安二萬陌  
飛劍斷取仇人頭咸陽關吏不敢收  
日落胡姬酒初壓繫馬卸下花貂裘  
男兒不作女兒態君但引滿百不憂  
君不見義

和西匿水東流丈夫年過五十不樂死卽休

賦得三峽猿啼送人之蜀

君不見蠶叢鳥道連三峽兩岸清猿啼不徹淒  
淒風露月明中行人聞之心欲絕送君西行秋  
已分正值猿聲日夜聞一聲一泪一回首萬里  
家山空白雲

妾薄命

偏側復偏側鸞鏡塵蒙月生魄紅粧委地成黃  
泥落花照人無顏色夫婿長安輕薄子紈袴雕

軟黃金縷銀餅酒肆調燕姬錦瑟胡床挾趙女  
浮雲上天水覆地桐葉那堪西風至孤負春華  
二十秋花鈿飄紅眉消翠近買阿嬌貯金屋舊  
人如土新如玉新人咳唾便成珠那顧舊人朝  
朝哭自恨紅顏薄命多甘將團扇泣秋荷新人  
一貌傾城姿似妾當初嫁君時

老將行

男兒猿臂赤虬鬚生長西邊心滅胡身騎八尺  
忽雷駁自將三千落鴈都少時不肯事筆研腰

掛雙弧鐵絲箭親從玄女授陰符羞向猿公鬪  
飛劍仰天大叫絕胡纓手拓弓弦霹靂聲山頭  
搏虎軟血飲眼中狐兔無縱橫一朝羽林報姓  
字殿前帶甲宮前睡庖駕時從馳道行射聲每  
向雲霄墜單于祭馬軍書驚烽火夜照甘泉明  
詔書催發漁陽騎車駕親巡緝柳營明珠勒馬  
黃金甲牙旗欲動角聲發馬革誰憐報主心豹  
頭自負封侯骨戟門號令肅寒霜刁斗嚴更懸  
秋月朔氣連朝作雪飛邊風一夜吹冰合孤軍

轉鬪三千里陰山水黑燕支紫已報前軍得左  
賢更催偏將追驕子白狼河斷暮圍張疏勒泉  
飛士氣強草裏殘胡半生死山前落日何蒼黃  
胡沙淨盡無牧馬全軍奏凱長城下身避大樹  
不論功車藏意以誰知者幕府軍功上不時朝  
對金門夕罷歸百年壯志在金革十載還家尚  
布衣棄置悠悠那復道東西烏兔催人老絮袍  
帶血夜聞腥脛骨傷瘢半枯槁穿楊技在眼將  
花破竹心灰鬢如草威名猶足怖胡雛末勢那

能穿魯縞里兒惡少欺衰翁出入攘臂路岐中  
天子不召雲中守廷臣但數貳師功故人書信  
經年絕老婦寒機終夜空荒逕不知春草綠茅  
茨長對夕陽紅昨聞羽檄飛幽薊十萬材官縮  
如蝟老驥寧無千里思太阿空有雙龍氣鷓鴣  
膏寒淬欲飛燈前拊視泪沾衣但願時平長不  
用日卧南山賦采薇

銅雀臺

侯王萬騎北芒死金人西辭咸陽市當塗斗柄

指許昌鄴下高臺揭天起高臺突兀凌虛空雲  
簾月拱香玲瓏采魚斜閣珊瑚輦閭闔平分羅  
綺風風吹羅綺嬌無力鏤簾銀牀夜爲日梳殘  
寶髻玉雕鏤粧罷雲奩金屈戌三千粉黛闔妖  
嬈膽落江東大小喬吳越已獻秦吉了建章新  
得紅鮫綃君王歲歲事征討玉輦苔深舊行道  
斗帳霜飛翡翠寒方塘水落芙蓉老一旦千秋  
遺令開蕙帳烟生獸炭灰春風處處聞絃管夜  
月時時上鏡臺春風夜月流年度獨望西陵自



歌舞墓門暗長新松楸羅袂猶沾舊雲雨掩泪  
相看入洞房翠翹零落碧窓涼枉作陽臺神女  
夢虛分西域返魂香石馬嘶風七十二參差碧  
瓦鴛鴦碎艷骨空隨桃李春荒基猶識金銀氣  
虎鬬龍爭事已非今來古往一沾衣只今惟有  
漳河水千載悠悠對夕暉

鴻門行

逐鹿雌雄猶未分玄黃血戰風塵昏楚軍一夜  
破函谷沛公平旦來鴻門喑啞衝冠忽成好尊

俎魚肉寧自保轅門寂寂無人聲殺氣如霜壓  
百草腰間寶玦光陸離三舉示君君不知壯士  
對起作劍舞電光閃爍驚蛟螭魚腸飛空繞座  
側五采龍文失顏色季父翼蔽輸血腔老臣怒  
氣填胸臆驂乘皆血濺七首生啖彘肩覆卮酒  
瞬息龍蛇此地分手裂虞羅脫虎口楚囚俘虜  
泣沾衣玉斗碎作冰花飛君王醉起咸陽火諸  
侯兵罷錦衣歸君不見彭城星殞楚歌合鴻門  
舞罷鴻溝割英雄千古恨難平灞水蕭蕭烏啼

月

金谷園

石家別館河陽湄白玉閣道黃金堦春風占盡  
名花種滿城桃李無芳枝錦障排空四十里七  
尺珊瑚海靈紫家奴半着火浣衫侍兒盡躡珍  
珠履蠟炬爲薪椒爲堊美人行酒蓮花幕玉掌  
淋漓濕不飛粉頸宛轉燈前落千頃芙蓉揚素  
波清涼臺上香風多琵琶初按明妃調懊惱新  
翻子夜歌子夜歌殘檀板急香塵舞罷嬌無迹

衛尉沉醉催賜珠翔風輕軀拜當席席半更衣  
轉曲房碧闌處處金盆湯將軍含笑脫犢臯侍  
婢夾道焚都梁宋禕笛聲遏雲起綠珠雙鬟眸  
如冰亭亭獨步媚橫陳坐客滿堂心欲死急管  
繁絃日轉西明珠帳角光琉璃絕塵快犢駕珠  
翠咄嗟豆粥和萍蘆八百蛾眉閑且都爭妍闌  
意共歡娛一日長安見車騎百年離別在須臾  
鴛鴦瓦碎闌干朽片片霞光散窓牖自甘白首  
味同歸肯使紅顏落人手紅顏已謝骨猶香繁

華興代總淒涼此却山上青天月夜夜清光照  
斷腸

夷門行

范臺美人夜行酒大梁城外烏啼柳紫衣一騎  
出宮門帳前椎碎將軍首君王卧內無人處神  
龍睡醒明珠去宮車晏起雷霆驚衛士相着色  
如土西邊羽檄催飛箭十萬材官前轉戰公子  
笑却邯鄲圍侯生甘飲龍泉劍慷慨臨風恨有  
餘三千賓客漫踟躕不是蛾眉思報主華堂虛

左枉停車

木槿歌

朝見一花開暮見一花謝今日花非昨日花明日斷腸憶今夜繁華寂寞反掌間青陽一去無時還綺羅香盡埋秋草城郭人非見故山君不見東西烏兔如織縷世事翻覆成雲雨花乎花乎奈何汝

楊花歌

河干大堤連彼邪千樹萬樹楊柳花可憐一夜

東風起散爲白雪飛天涯青樓美人惜顏色對  
此臨粧泪沾臆陌頭春事已闌珊天畔行人無  
消息深院沉沉睡不起愁見楊花入簾裏時黏  
燕觜上雕梁半作浮萍逐流水流水無情去不  
迴楊花歲歲落還開惟有朱顏易拋擲朝朝華  
髮鏡中催

垓下行

愁雲黯黯連平楚幕烏啼霜月欲曙漢軍四面  
楚歌聲美人帳中泪如雨君王慷慨起悲歌逐

鹿雄心竟若何百年意氣一朝盡蓋世英雄空  
逝波烏江沉沉風淒切寶劍寒星光欲裂千里  
烏騅不肯行八尺重瞳化成血西望咸陽火尚  
紅羞將面面向江東却憐亞父無奇計日夜徒  
思殺沛公

易水行

天寒日落夕風起壯士驅車渡易水怒髮衝冠  
去不迴徵聲淒淒角聲死白衣祖道泪沾臆仰  
視長虹貫白日雞鳴函谷叩開關虎踞秦庭笑



小意齋集 卷八  
相揖督亢圖窮也首見絕袖超屏繞空殿殺人  
浪說秦舞陽劍術未傳魯勾踐七尺微軀安足  
云山河破敗逐浮雲不及黃金臺上骨至今人  
說樂將軍

長相思

長相思乃在玄都之巔碧海之涯上有萬里浮  
雲天下有弱水茫茫山欽欽水遠山高不可越  
昔日朱顏余白髮碧苑時棲楊柳烟玉階空度  
梨花月月照長門三葉秋銀屏金井夜悠悠昭

陽殿裏聞歌舞長信宮中望女牛漢宮一去胡  
天杳紫臺日落陰山曉蘆葉吹殘出塞聲琵琶  
彈盡相思調長相思相思無窮已少婦簾開朔  
鴈迴征人帳動邊風起虛將寶帶結同心忍見  
鸞釵斷連理梧桐霜隕翠幃寒茵苔膏銷夜燈  
死絡緯啼秋何太急青春過眼莫虛擲年少相  
逢不盡歡去後相思竟何益君不見李陵臺下  
春不至燕子樓中日爲歲白沙如雪草如烟總  
是相思斷腸地

采甫吟

朝登梁甫暮登徂徠朝朝暮暮浮雲徘徊浮雲  
茫茫連東海玉兔金烏不相待眼中城郭無人  
民昔日市朝變荒壘荒壘蕭蕭無人處西風吹  
落棠梨樹君臣際會成雲龍死生離別歸丘墓  
龍無尺木困重淵驥服鹽車虎當路皇天日月  
不迴光飲恨重泉向誰訴君不見桓公返國忘  
射鉤兵車九合盟葵丘易牙監刀亂顧命一朝  
委骨無人收又不見公孫開疆古冶子力拔南

山射青兕君前相國進讒言頃刻三桃殺三王  
梁甫山何崔嵬上有日觀峰下有封禪臺金泥  
玉檢俱零落七十二君安在哉但見海水茫茫  
日出復日沒東西照耀金銀臺瀉池壁返沙丘  
櫝徐福樓船竟不迴梁甫吟休歎息千古繁華  
逐逝波百二山河宛如昔畫邑城西古樹黃穆  
陵關上寒烟白春風花發穰苴營夜雨烏啼孟  
嘗宅雍門琴聲何太悲牛山哀泪空沾臆泪亦  
不足墮聲亦不足悲天地翻覆任爾爲仲連蹈

海不受賞稷下諸生那得知

明妃行

漢宮佳人絕代無明媚不數秦羅敷自恃容華  
罕儔匹豈知恩寵憑畫圖十載長門不召見冷  
落銀屏掩秋扇呼韓初款五原城才人却出昭  
陽殿自憐二八良家子生長荆門漢江水金屋  
翻愁白日閒玉門始識黃沙起黃沙茫茫白日  
晚胡天日近漢天遠曉霜吹鏡綠雲殘夜雨啼  
粧燕支損獨抱琵琶馬上彈驚風撲雪聲淒酸

無定河邊雲色暝望鄉臺上月輪寒月輪雲色  
殊鄉域羌管胡笳泣終夕羶落新凝馬乳酥射  
生早獻駝峰炙單于夜獵醉將歸帳中玉筋暗  
沾衣蛾眉空望黃金贖春夢長隨朔鴈飛鴈飛  
年年人不至艷骨香肌葬胡地青草誰招薄命  
魂黃河盡作思鄉泪黃河青草恨悠悠漢月胡  
雲總是秋君不見宮人斜畔花空發夜夜啼鵲  
怨未休

猛虎行

風吹寒楚淒淒日暮百獸辟易猛虎當路雞犬  
不敢啼居人堅拒戶村中無豚犢草間絕狐兔  
悲哉猛虎徘徊杳怒目光掣電牙歆血踞地一  
吼山石裂首耳不來麟足左折天公遣汝爲民  
孽君不見泰山下北平城朝朝暮暮聞哭聲又  
不見海南殺氣飛騰騰不見猛虎見蒼鷹猛虎  
尚可蒼鷹殺我

行路難四首

君不見樂羊拔中山子肉甘如飴謗書盈篋雖

不入歸來行賞還心疑又不見馮氏婕妤當熊  
立宛轉蛾眉不自惜宮車晏起長門秋飲恨吞  
聲仰天泣人生托迹莫托心對面山高滄海深  
山高海深有終極人心茫茫不可識

君不見虞卿躡屩說萬乘一見千金再見受  
相印一朝窮卧大梁城公子侯生不相訊又不  
見石家翔風輕骨軀香塵舞罷百琲珠寵稀恩  
斷作房老容華搖落怨秋草得意失意俱偶然  
日月虧旻天無權翻雲覆雨眼前事困龍升天



星墜地

君不見太行巍巍九折坂行人一去不復返前  
車軸折骨未收後車磷磷不可留又不見瞿塘  
三月桃花水寒濤一瀉三千里魚龍出沒蛟夜  
啼處處湘纍哭山鬼山中虎豹當道卧水底江  
豚吹浪簸風浪暮暮復朝朝不在山水在市朝  
鳥生八九子結巢枯樹巔下攫道傍肉高飛雲  
霄間西風夜號樹枝朽羽毛零落狐狸口狐狸  
來往捕鴉雛不知有網在路隅虞人夜張網荆

棘傷指掌鳴乎安得世路無荆棘使我康莊行  
終日

四愁詩

一思曰我所思兮在長安北風吹雪道路艱浮  
雲蔽日易水寒君門萬里高嶺岨願爲春鴈翔  
雲端美人贈我大屈弓何以報之朱絲桐路遠  
莫致憂忡忡何時矯翰朝天宮

二思曰我所思兮在閩中南風赤日炎火紅長  
鯨狎浪驚豐隆故山萬里高龍從願爲秋燕翔

雲中美人贈我相思子何以報之鴛鴦綺路遠  
莫致憂靡靡何時矯翰歸故里

三思曰我所思今在蓬萊東風吹水滄溟開弱  
波茫茫渡無杯三島萬里高崔嵬願爲遼鶴翔  
雲隈美人贈我九節筇何以報之雙芙蓉路遠  
莫致憂隅隅何時矯翰躡仙蹤

四思曰我所思今在雪嶺西風曠楚流沙冷山  
狐短蜮射人影三三萬里高溟滓願爲靈鷲翔  
雲頂美人贈我白牛車何以報之青蓮花路遠

莫致憂咨嗟何時矯翰昇龍華

狂士歌下邳舟中作

東南有狂士身不滿五尺頭冠側注縵逢掖五  
月披裘委道側讀書恥不讀萬卷倚馬落筆疾  
於電欲將壯猷追夔龍羞從世人學書劒西游  
長安謁明主賦奏甘泉苦不遇不作燕臺賣  
駿人思返閩江釣鰲處是時春光正瀟灑風送  
片帆如走馬但覺文章有鬼工寧知貧賤居人  
下貧何憂賤何苦富貴同歸一坏土世情自波

瀾翻覆成雲雨綠楊深處啼杜宇不及于今早  
歸去歸去故園花未殘荔枝初熟菊可餐貂裘  
已敝蒯緱不彈風塵慘沮摧心顏抽刀欲斷黃  
河水擊筑長歌行路難行路難休太息長繩自  
古難繫日驂騑豈肯甘伏櫪君不見杜陵走踈  
踈王融笑寂寂長卿未遇時當爐器自滌獄中  
寶劍雙龍鳴爲雌爲雄未可必安能跼蹐瑣尾  
受人憐盛年蹉跎空頭白歌罷氣塞不能語呼  
童命觥更起舞夜半風急江天寒但聞玄猿哭

月鬼嘯雨

贈邵廣文夢弼

有客傳是青門叟雙鬢毵髯過手避秦東陵  
學種瓜瓜成千頭太如斗好竒猶賣兩京卜落  
筆能令天雨粟紫芝眉宇皎冰霜腹中竒文滿  
萬軸自言十五從師傳輒軻竟被儒冠誤廣文  
官冷坐無氈首宿盤空羹難筋以茲瑣瑣不適  
意拂衣羞作折腰吏竹根如意鐸皮冠混迹賣  
漿從酒肆門外春深雀可羅坐來注易行高歌

十萬不跨揚州鶴五千時換山陰鵝而今行年  
七十幾日向滄洲吸烟水一片白雲飛盪胸萬  
里清流堪洗耳偶來訪我碌碌者相視大笑林  
之下北海已忘正平年仲宣能倒中郎駕忘年  
倒駕世所稀文章意氣成心知共坐西窓話夜  
雨時從齊郡典春衣春衣典盡月生牖耳熱鳴  
嗚呼擊缶六月炎氣逼虛堂君盡一石余五斗  
翻雲覆雨君知否富貴浮雲我何有飛花歷歷  
笑人狂鳴鳥嚶嚶勸君酒勸君酒請君舞醉來

拔我鸛鷀刀爲君裁成鸛鷀賦四方諸侯誰愛  
才七貴五侯何足數邵君邵君牢落君莫憂丈  
夫一句足千秋人生知也須青眼古來盛名多  
白頭

無諸行

旗山石鼓東西抱千樹萬樹青榕老金鎖江空  
落日寒塵飛遙見無諸道無諸開國雄南陲離  
宮甲第連郊圻花枝春滿蟠桃塢劍氣秋高歐  
冶池秋風春雨流年改樓閣巍巍控滄海白雉



斜園萬竈烟六鼇長駕三山在三山自昔號名  
區富貴繁華絕代無絃歌夜戶連千陌燈火黃  
昏滿九衢琳宮紺殿參差起寶塔雙雙插雲裏  
山寺時聞梵唄聲郊田半屬伊蒲米西湖百里  
盡荷花夾岸垂楊隱俠邪綺羅盡日嬌秋水簫  
管中流咽暮霞名倡不數邯鄲妓俠士相過趙  
李家鐘鳴朱郎黃金埒香擁青絲白皐騶事去  
人亡駒過隙眼底興衰總陳迹草色淒迷王霸  
壇荔陰猶覆何仙宅洗馬橋邊秋葉黃釣龍臺

下寒潮白釣龍躍馬骨已朽宋殿唐宮復何有  
故老能尋碧洞榴行人尚折平臺柳平臺下接  
古羅山逝水年華去不還惟有空門未消歇鍾  
聲夜夜白雲間

短歌行贈游及遠

有客有客來壺公手中贈我金青葱錦心搗成  
五鸚鵡秀色繪出雙芙蓉自言年少便落魄恥  
着儒冠困逢掖欲將詞賦垂千秋却爲雲山遍  
雙屐醉騎九鯉入無諸袖有琅玕橐有書日從

酒人呼五白脫幘大叫成梟盧與君相逢胡不  
早芝山識君仍草草問君詩情近若何如練澄  
江安足道短歌行歌已闕如意擊殘壺口缺丈  
夫得意在汗青莫使年華半如雪

送鄭初遊吳

鄭生本是豪俠客碧眼燕領髯如戟才名籍籍  
八斗餘家徒蕭蕭四壁立扣角行謁出鯉湖探  
奇躡躡來烏石少陵詩助應有柳阮籍窮途終  
落魄五陵冠蓋何繽紛片刺磨滅長離羣竹塢

叢中冒山月荷衣袖裏留秋雲秋雲山月不可  
掃白眼滄洲向誰道不爲羞澁看早曩却因牢  
落嘲玄草以茲鬱鬱意不愜欲學盧敖走溟渤  
五湖幸容鴟夷皮千金誰求駿馬骨壯遊離家  
意軒舉青萍陸離光如炬赤城桃花紅欲然白  
門柳色嬌應語醉挾强弩錢塘頭紫雲瑞石酣  
高樓館娃宮前麋鹿走秣陵臺上鳳皇遊鳳皇  
麋鹿空陵谷慷慨悲歌仍擊筑滿坐賓客髮衝  
冠揮毫但聞神鬼哭鄭生鄭生休猖狂壯士豈

能久在囊世情翻覆雲成雨丈夫寧數金與張  
不然秦賦達明光不然乘雲遊八荒拂拭雙劍  
如雪色雌爲莫耶雄于將人生隻字垂身後俠  
骨千秋猶自香

送周喬卿歸莆

金粟臺上雪初晴北風欺人不可行客子驅車  
向何處出門南望莆陽城莆陽大道海雲裏遊  
子悠然思故里駿馬驕嘶不肯行一曲驪歌汨  
如水憶昔芝山七月秋與君盟就海中鷗數行

古字鐫蝌斗滿架奇書汗馬牛秋去冬來氣蕭瑟  
孤客無媒終落魄黑貂裘敝囊橐空落日寒雲黯  
行色此時爲別意匆匆去住風烟各萬重  
峽江隔斷三山色浮萍一散何時逢吁嗟周郎  
歌莫悲看汝不合長數奇閉門好就凌雲賦丈  
夫遇合自有時

短歌行贈聞人蓋

金粟臺上秋雲黃梧桐葉落露爲霜逢君意氣  
便傾吐葡萄之醅行綠觴花枝當籌舄相促日

脚倒地燒銀燭一令百巡江海枯主人當壚客  
擊筑酒酣大叫灑烟水片片雲霞衝綃起七貴  
持錢不敢求興來筆落動千紙問君落落何爲  
也倣儻猶在風塵下一官羈絆不容身千載留  
俟知音者千載知音世豈無相逢不醉胡爲乎  
天明秣馬臨長路後夜思君賦白駒

聽松歌爲龍丘尹光祿賦

吾聞徂徠山乃在大海東絕地三千五百丈攢  
青削黛何龍從蒼松摩霄千萬樹連蜷礪魄如

游龍老柯撐空根蟠壁翠色去天不盈尺倒生  
偃蓋無不佳紫鱗碧髯光相射日月蔽虧沉澹  
多精爲青牛脂琥珀蓬蓬噫氣從天來萬壑千  
峰悲蕭瑟來如騎士鳴金鐵收如緱嶺傳笙簧  
怒如錢塘八月暮潮吼清如泠泠七絃被宮商  
前者唱喁後者嗒大聲窸窣小鏗鏘飛鳥過之  
且不忍去白雲爲之久迴翔此山之人紫眉白  
皙饑餐朝霞渴飲玉液朱眸耿春星冰肌映寒  
日身騎蒼龍三千年醉歸瑤京鶴一隻富貴於



我如浮雲自愛松聲枕危石危石秋濤響萬籟  
伊人娛心與之會坐弄胡琴長嘯餘頽然一夢  
烟霞外君不見洛陽三月桃李滿燦如錦障綻  
如盃一旦秋風花亂飛啼鳥荒苔腸堪斷君聽  
松我且歌五陵臺榭空山阿人生不樂鬢易皤  
安能澄清待黃河願君日卧松下長婆娑長婆  
娑松聲聒耳衣女蘿笑飲天酒朱顏酡山中宰  
相安足多噫吁嘻山中宰相安足多

贈陳汝翔

文章欲新交欲老男兒名譽苦不早曰石行歌  
悲隱淪少年顏色空枯槁大雅不作王風沉蛾  
眉交加迹如掃安得健步附青雲流水龍門委  
芳草萬事糾紛旗鼓偃此意蕭條向誰道晚來  
諸子連鑣興脩篇短什風格老近代七言稱長  
城柯嶼陳生汝翔好汝翔一身湖海客戟髯廣  
穎雙瞳碧鄴下驚傳八斗才壇中最數萬人敵  
力兼沈謝愁未工色奪曹劉頓相失醉來據地  
每大叫玉山將頽映寒日愛我風流贈我詩歛

然相視心莫逆傾蓋問答未及已感新憶故轉  
愁疾落魄風塵三十年韋編幾絕聚螢泣誓將  
國士酬青萍豈料荆山遺白璧妄意千古事茫  
茫天地崩翻何人識感君此言泪如雨氣酣哽  
咽不能語人生樂在相知心身後萬事俱塵土  
高歌一曲爲君舞勸君且飲休延佇眼中之人  
吾與汝

雨中同徐惟和胡德長陳汝翔訪曾文表

醉歌行

寒風十月動林藪細雨蕭蕭行人走短屐衝泥  
步屢顛遠訪城邊灌園叟老叟蓬頭面未洗蔽  
竹窺人便倒屣齋頭書劒亂縱橫畫角瓊簫添  
雕几几上古琴五十張朱絃玉軫錦爲囊自云  
一一焦桐質年代豈識晉與唐旋呼瞎僮炊精  
飯入池網魚魚破膽鱸鰖跳躍困入庖頃刻銀  
絲出玉椀坐間汝翔更大嚼徐卿杯酒顏如渥  
胡生矮小謝生狂抵几爭言醉相搏酒闌歌罷  
意故長浮生歡會安可常日斜分手出門去明

朝世事兩茫茫

山齋小集

女大赤頰鬚隱頤一飲百杯工爲詩平夫傴僂  
三尺強醉後唾罵成珠璣胡生短帽鬬如顰貌  
得雲山真逶迤徐二消瘦如稿木文章落筆走  
蛟螭主人延客烹園葵白玉床頭酒千卮寒風  
蕭颯逼虛牖敗菊歷落垂東籬談鋒向天天欲  
裂歌聲數起愁鵬夷君不見人生長如柳上絲  
隨風忽聚散豈能守高枝爲君起舞倒鹿皮請

君擊筑予和之浮杯試問東流水今日之會安  
可期

十五夜觀燈卽事

冶城春風落芳夕家家燒燈夜爲日萬眼丹蓮  
吐九光一曲梅花動千陌陌頭車騎何繽紛香  
風幾陣吹紅裙虹橋欲射廣陵月冰綃半染巫  
山雲後來細腰最年少嬌立風前殊窈窕寶釵  
珠被穩稱身夾道遊魂隨一笑五陵甲第競豪  
奢繡柱朱門公子家白玉堂開錦步障黃金勒

控連錢花連錢金勒驕千里紅塵處處如雲起  
絲鞭醉拂胡家壚踏歌還過平康市平康市裏  
月無色水晶瑠璃花萬斛八寶裝毬落地輕六  
鼇幻山照天赤夜闌簾內笑語喧歌聲宛轉飛  
梁前行樂應嬾玉漏促夢迴又是夕陽天君不  
見蘭亭已頽金谷朽賞心那得長如舊明年世  
事兩茫茫此地繁華知在否

遇徐惟和宅艱南奔

八月芋江曾送爾吐氣如虹思萬里今日平原

逢爾歸手持衰經雙泪垂來往風霜可憐色杜  
鵲處處啼紅血知君雞骨不支牀枯殺鰲山幾  
枝栢

苦熱行

君不見長安五月炎風生黃沙欺人不可行長  
天倦鳥投大屋疲駒汗血喘且鳴陰陽驕蹇久  
煩燥赤日燒空無野草農人望雨如望玉日日  
紅雲出暘谷更恨偏側轉多蠅朱脣嘯聚相憑  
陵衣裳顛倒睡不得又逐車塵走南陌陌頭流



金裂古瓦款段日中不得下皂衣束帶心煩冤  
罄折猶遭官長罵忽憶故園東海東蘿衣石榻  
生松風荔枝綻紅桃吐緋望王孫今胡不歸

哀寧夏

賀蘭山頭日欲西寧夏城上烏鴉啼黃塵四合  
殺氣腥通衢骸骨踏成泥家丁索糧渴不得探  
丸一斗如雲合可憐党馨無完膚闔門百口遭  
塗餒縲絏總兵督藩邸官府不從頸加七僞詔  
十道出將軍竟無一嚼睢陽齒白梃出拔七十

堡官軍望風戈自倒套虜生心窺漢關花馬池  
邊跡如掃西輔遊參不敢前孤城斗絕竈無烟  
可憐城中十萬戶良賤婦女汗腥膻黃昏雲愁  
野鬼哭征戍十家九家沒關中銅駝心膽寒白  
楊悲風吹函谷幕府羽書日夜馳空聞 朝廷  
遣帥師鞭長豈能及馬腹蕭孌呂姥何委蛇士  
無行糧不宿飽水艸空乏戰馬疲三軍死力安  
從出牙籌無計愁度支况復賊兵耐死戰此曹  
何異犬與雞我思 二祖血戰百艱難雄師億

萬連雲屯虜庭三犁斗南見然後九邊繹絡藩  
長安二百年來漸闕茸熟夷數世侵潮灣遼陽  
已失據東勝復外捐胡人飲馬三空河雲中上  
谷多烽烟遂使鼠輩乘釁起肘腋直突積薪誰  
使然吁嗟乎有司無良將臣竄文臣不知邊卒  
苦寒霜如戟日如燒餓守空營僵卧死君不見  
西海頭長城下白骨如山誰爲數嗚呼安得大  
箭落欃槍上天應爲洗兵雨

苦旱行

五月長安道火雲燒百草鳥雀不敢飛禾黍同  
枯槁西山髮焦金石流炎沙漲天天爲愁石燕  
畏風商羊死華陽肥遺何所求健婦荷鋤出南  
土土燥如瓦日如炬桔槔達旦不得眠揮汗時  
作田中雨東方小兒舞土龍泥人鶴立青壇中  
少女枝頭風不反時見晴霞浮高峰雲根寸合  
忽而止雨脚如絲未到地涓滴難甦涸轍魚雷  
公電女何兒戲得非土丘裂無乃跋烏翻夸父  
之行不得上后羿畢羽空長嘆雨師失職既有

以蘊隆萬姓哀摧殘安得壯士決西江一注下  
土開心顏嗚呼一注下土開心顏

館試虜王貢馬行

是日以脫格被放

君不見天馬產於渥洼注水雷電噴薄真龍起身  
染春雲成五花嘶向流沙思千里飄飄猛氣久  
無敵雙瞳夾鏡蹄踣鐵長風吹入玉門關連錢  
驕映黃金勒巍巍帝德格千羽越裳白雉肅  
慎楛足練望中堆錦雲朱汗迸落如紅雨上苑  
春深苜蓿肥勅歸內廐行如飛廐中龍種四

十萬神骨相向生光輝天生神物歸聖代無  
勞貳師重出塞只今西北陣雲高何日長驅向  
天外

雨中過曾人倩因懷陳七振狂

燕市將秋雨不歇泥深徑久行人絕孤城一片  
烏鴉啼茅屋千家搗練急嶺南故人喜我來斗  
酒相呼歌轉哀風塵傾側勿復道不堪回首釣  
龍臺

齊中有懷

越鳥御南風塞馬斲北草美人隔長天游子悲  
遠道遠道連縣燕復齊車塵馬足自東西正是  
相思腸斷處王孫草綠子規啼

采菱詞

長歌短歌采菱詞飛來飛去青鷗鷺西風吹波  
綠於染羅衣女兒如花面玉簫一曲初學吹月  
白千峰人不見

錢唐觀潮

錢唐八月西風高吹開海門來波濤白日黯澹

忽無色天際突起悲怒號高壓千層華嶽動光  
搖萬壑金銀臺燿如鐵騎銜枚走轟如空谷驚  
奔雷天柱東傾鼇足折馮夷擊鼓鮫人泣長年  
膽落不敢前河伯望之長嘆息潮來天地黑潮  
返千峰白天爲岸兮雲爲帆流沫如山兮花如  
雪噴飛沙而吞城摧層崖而破石頃刻遙空千  
里平但見水族百怪當波立雲慘慘兮作雨烟  
冥冥兮遮日空碧照耀蛟龍宮匹練晴翻鼉鼉  
宅錢王强弩安所施精衛銜土愁無力得非尾



閭裂或者東南缺故老云是伍公之忠魂遺恨  
千年猶未滅曰余畏途未白首朱顏忽盡成老  
醜滄海幾度變桑田羊腸九折無不有嗟爾估  
客胡爲乎來哉天吳九首甘人骸一葬其腹如  
塵埃武林歌舞地千載有餘哀請聽湖上采蓮  
歌猶自勸公無渡河

登接筍崖

危哉接筍崖乃在碧落裏上閣丹梯七百層下  
臨深谿不見底行人攀木如窮猿一步一息驚

飛魂白雲時從足底過天語半在空中聞須臾  
梯盡復石壁仄徑逡巡半容足鐵鎖橫絕翠微  
巔遙似寒星亘天闕我來振衣步蒼苔捫參歷  
井真崔嵬對面不見更衣臺玉女賓伏如嬰孩  
中有羽人斲山骨珠宮貝闕訇中開黃鶴之飛  
且不到此惟有海日天風時往迴吾聞海上有  
蓬萊弱水環之無塵埃日月爲轂霞爲杯此中  
無乃是秦皇漢武胡爲哉下山十里月如水咲  
掛青蛇歸去來

蠶婦謠

三月湖邊柳花飛吳興街上河豚肥春風少婦  
靚於玉素手攀桑大堤曲日日求桑夜不眠眼  
望絲成衣得穿春蠶三眠猶未起門前聞有催  
租吏

三品石歌爲吳樞季太守賦

吳公宅前幾片石狀如伏虎質如鐵故老相傳  
三百年蒼稜盡蝕土花色突兀三峰削不成龜  
紋犀理漫縱橫忽疑屋裏青山出頓覺滿堂烟

霧生秦皇鞭斷漢柱折雙影對蹲中孤立竒態  
豈無神護訶玲瓏祇有雲出入君不見集賢學  
士趙家子手題此石墨尚泚文采風流無復存  
空留片石荆榛裏我來踞石坐便欲共石語丘  
壑還如見古人卧遊何必親杖屨醉來拔劍斫  
蒼苔古今勝跡總塵埃蘭亭金谷俱已矣一泉  
一石安在哉但當對石快飲酒莫思身後令心  
哀落葉滿階月墜地商歌一曲城烏起

月夜懷陳汝大

汝大老子興飛越當年醉我採山蕨窓前涼影  
雙梧桐金杯倒挂青天月月今隨我渡茗水兩  
地清光幾千里永夜思君君不知明河落盡鴉  
聲起

送周喬卿遊姑蘇

有足莫畏行路難有泪莫作臨岐別男兒一經  
死牖下何異禪中老蟣蝨陳生已去周生來南  
雲千里北鴈哀長風吹冷吳江水送君獨上姑  
蘇臺君不見吳王昔日高臺上西施醉舞鮫綃

帳繁華寂寞及掌間荒臺麋鹿空相向舉杯勸  
君君莫辭遇合何必在當時貧賤富貴眼前事  
千載悠悠知是誰

送沈伯含進士之燕

五月衰楊不堪折憐君遠作燕山客江飛欲盡  
不盡雲馬踏將殘已殘月月滿孤城酒在壚相  
逢不醉胡爲乎君今通籍歸三殿我且扁舟泛  
五湖

送吳翁晉之金陵應試

朝發白蘋洲夕望鐘陵陌丈夫快意遊寧知遠  
離別鐘陵八月虹爲橋看君意氣干雲霄鳳凰  
臺上馬蹄疾慷慨何須問六朝

男兒行

長興男兒最輕死多在公門少在里水田力薄  
租稅繁十年逋負官倉米私開菱蕩爭捕魚負  
鹽夜向四安墟不然東入太湖去日望朝廷  
下赦書

女兒行

歸安女兒多在麗椎髻赤腳入城市十二嫁夫  
學哺蠶蠶稀不足衣食費夫壻經營長不歸翁  
孀相惱隣里欺幾回欲逐琴心去却笑相如尚  
布衣

贈何郡丞

有引

何郡丞挺嶺南人也始至遺余雙倭刀余以  
朱絲琴答之賦此爲贈

美人贈我倭赤刀何以報之雕綠綺半天紫氣  
入首山一片清心寄流水昆吾發矚三尺短龍



門枯枝尚未爨目中已信無全牛指上還疑有  
歸鴈清莫清於脫光之水鏐悲莫悲於繁絃之  
羽激鵲鵲膏寒霜作花水龍吟罷風吹葉知君  
愛我如王祥我亦思君若中郎攜琴換刀各有  
意精材神物兩相當方今南北風塵黃爲君一  
擊中山狼更斬鯨鯢落欒槍歸來高枕白玉床  
刺桐花下秋月光七絃泠泠被宮商脩如鸞鳳  
鳴朝陽君不見陳留謝生少且狂二年奔走若  
溪傍四海之內皆兄弟感君意氣神揚揚排山

倒海不足惜詩成問天天應泣酒酣拔刀碎胡  
琴一雙白眼何人識

登吳羗山

吳羗已去留靈蹟謝公亦有登山屐千村落日  
炊烟青一片孤城秋水白峰頭石篆半爲苔雲  
裏老僧不識客欲拚簪紱付滄洲自分烟霞成  
痼疾

登雷峰塔

雷峰古剎臨江左寶篆香消翠烟鎖落日空歸

伍子濤浮屠半人謝仙火老僧阜錫峰之巔繩  
床布被抱雲眠西湖歌舞有時盡青山白雲不  
記年

感懷

我年二十七足已半函夏寄食梁楚間歸返閩  
山下蚤歲負雄心讀書兼騎射受知王瑯琊萬  
言曾倚馬骭辭傲千秋意欲策長駕勒石燕山  
頭草書玉堂夜坐使元氣還狂流回大雅誰知  
此意竟隱淪鵠來作更大湖濱阜衣烏帽腰長

折滿架簿書多苦辛城中黃塵如雲起日出關  
頭迎長吏五月炎風熱似燒半夜寒霜凍如水  
有山不登浮玉頂有水不汎罨畫溪山頭紫芝  
應長笑溪上百鷗還復疑昨寄封書舊酒徒故  
園松菊將荒蕪青山白業堪長往好將吾道問  
潛夫

夜讀陳惟秦詩

惟和自南來奚奴負鴟夷中有雲錦囊百是陳  
生詩我來燒燭開一卷五色龍蛇忽驚見怪底

雲霞千萬重玉屑如花飛片片秋釭倒盡歌未  
畢梧桐樹杪風蕭瑟滿地時聽金石聲虛堂已  
聞神鬼泣月印空潭千頃寒雪壓孤峰一天白  
又如泝水立赤幟坐令趙卒無顏色陳生陳生  
風骨殊少年不患肝腸枯誓將大業俟千載豈  
與里耳爭錙銖腊鼠漫稱鄭客璞彈雀寧用隨  
侯珠君已泥塗甘曳尾我今丘壑從此始會須  
拋却五斗米與君共釣龍江水

南風歌

我船西北來海風東南急南風識我苦相留欲  
去還遲三五日寸雲吹合千山青惡浪飛翻一  
天白如抖如怒驚夢魂欲定不定愁傾側林莽  
蕭蕭五月冷地坼山摧忽已暝叱咤但聞雷雨  
聲紛拏時見蛟龍影長年徙倚不敢前使君望  
之心茫然安得長繩繫風伯一夜飛度閩江邊  
悠悠南北皆吾土寄謝南風無相苦更聞北地  
氛塵高辛吹胡兒勿南度

秦逕山吊秦美人

鹽官城北山前寺，艷骨香消歌舞地。人去空餘  
草木春，夜來猶識金銀氣。玉輦東巡不復回，六  
宮羅綺生塵埃。荒墳片石猶堪吊，試問咸陽幾  
劫灰。

捕蟬行

悲蟬依密樹，側身避螳螂。稚子拈竹竿，引線扼  
其吭。苦心自合吸風露，委蛻寧免飼螻蟻。人生  
災患夙所嬰，小知營營徒爲爾。

雪後鄭翰卿招遊湖上

天涯客不歸湖上春初至一夜西風雪滿林不知梅花已開未雪晴花滿水如烟南北高峰色接天更有主人能醉客不妨卧向玉山邊

送王玉生還家

江上梅雨惡問君何所之君言遊已倦歸返閩山陞閩山五月雪爲峰荔子枝頭十里紅我已陸沉慙柱下君應潦倒卧牆東

百憂行

行年三十頭已白撫劒中宵百憂集四海風塵



游子驚國是未定孤臣泣天狼明沒海波腥烽火夜照國西營士卒已罷遼左戍將軍空築受降城近聞朝廷遣封使金章玉帛豈論費鴨綠江邊浪正高馬島山頭塵猶沸天使超超不敢前野心狼子終攜貳彼此消息兩茫然國事無乃同兒戲古來和戎非上策況撤藩籬使之入廟堂議論付黃口百萬赤子非魚肉已巳庚戌鑿豈遠至今戰鬼夜猶哭憂天杞人不得眠秉鈞元老籌須熟莫愁軍需無所措宮中聞有

大盈庫

送陳永奉還家

有引

永奉書生也未知游乙未冬爲其從子要之  
吳道相失至姑蘇城下爲盜所劫奔金陵丐  
衣於其從子時方盛寒從子以葛衣畀之凍  
餒幾死適遇周喬卿徐興公衣食之得達茗  
溪余始爲治歸裝而歌以送之行

十五攻文史二十學詩賦半生未曾出郭門萬  
里安能向行路行路難難於上青天丈夫豈肯

受人憐汝有負郭一頃田家室胡爲輕棄捐瘦  
馬夜衝越溪雨布帆秋冒吳江烟吳江烟盡寒  
生早鼓鼙滿地生荒草暴客嘯起綠林村王孫  
啼向白門道身竄荆棘餐糟糠風奔露宿勢蒼  
黃人情對面隔山嶽骨肉亦化爲豺狼若非故  
人相憐念會當凍餓死誰收汝骨姑蘇傍苕溪  
水清魚可數孤客蒯緱聲彌苦滿座誰知陳孟  
公乞食寧須謝仁祖二月春寒晝陰陰遊子思  
家意不禁高臺白髮柔腸斷茅屋青山落葉深

送汝出門泪如水離思歸心兩悲喜逢人若問  
遊何如但得古存亦足矣

茗溪草堂燕集觀牡丹放歌

茗溪三月春無主桃花落地柳花舞草堂晝靜  
午未開卷簾幾度清明雨雨過蒼苔花滿園紅  
明綠暗鶯聲繁主人企脚不理髮安能束帶向  
朱門牡丹初綻大如盃幾枝偏傍南窗煖亭亭  
凝笑復含羞座客見之魂皆斷姚黃魏紫不足  
愛丹霞剪作神仙珮國色寧容蜂蝶侵天香未

許芝蘭配日照露浥無不佳臨風映水尤多態  
恍如燭龍銜耀倒挂珊瑚枝明珠萬斛光琉璃  
又如妃子初入浴香水滑膩流臙脂三千粉黛  
見之無顏色而况與羣水百卉爭芳菲主人惜  
花惜欲死日日花間卧不起若使花神解語時  
謝公何必東山妓名花愛客不辭紅客來莫畏  
酒尊空今日看花不盡醉明朝花落生秋風君  
不見風吹花開還吹落今日花開不如昨可憐  
人面不如花安能長在花間酌酌君酒爲君歌

日月疾於東逝波人世開口那能多花乎花乎  
索爾何

橫海謠五首

黑風吹海海水立鳥王張顧龍女泣脩鯢翻波  
千里濕爰居已集東門樹精衛空銜南山石  
射潮弩短無長箭金山草枯溷濺面天使騎猪  
向南趨元戎出金募樓船三軍汨落如紅霞

卽事呈陳伯孺

石榴花下浮大白客來懽呼脫巾幘元龍豪氣

萬金錢付一擲郡舍如冰放衙早盤薦楊梅坐  
芳草舟中誰贖溫太真坐間竟識袁彥道君不  
見中原鹿走楚漢爭何如蠻觸相持衡仰天大  
笑各分手寒山日落君江橫

錢唐逢鄭翰卿

少年作客不還家裘馬快意天之涯豈能區區  
守妻子手足繫繫如匏瓜去年寄食薊門秋日  
日使酒卧青樓今年遇我錢唐上醉挾強弩射

潮頭黃金轉眼聚還散俠氣向天天爲愁酒酣  
側理掃千語寒光紫氣非吳鉤青袍白幘厭奔  
走回首故園多離憂故園田舍長茂草兒女衣  
食泣道周汝有幼弟能作賦千金安得長門求  
勸汝行役早歸來四海烽火道阻脩嗟余辭家  
亦五載聞道桑田近成海故人零落可奈何昔  
日朱顏今已改與君俱非少年時世情冷煖君  
自知貧賤富貴何足問但當努力千秋期一曲  
悲歌不可竟松間秋月漏新影唾壺擊盡空斷



腸蕭蕭四壁蛩聲冷

錢唐七夕

去年七夕松陵秋盈盈一水東西流今年旅食  
吳山上望斷銀河度女牛烏鵲南來妬飛燕露  
華寒濕芙蓉面始信人間多別離不如天上長  
相見

乞巧詞寄桃葉侍兒

冰壺魄濯琉璃影天階露凝羅襪冷珠簾初捲  
瓜棗陳下拜低聲自陳請蛛絲絡盒夜欲半目

斷秋空雲錦亂乞得巧來郎未歸鴛鴦繡罷空  
腸斷

韜光庵金蓮池歌

君不見韜光昔日來西川誅茅駐錫巢溝巔太  
守招之不入郭自言引水種金蓮山中松竹千  
萬樹更着蓮花爛如霧色奪龍泓幾片霞香分  
鷺嶺三天露人亡事去一千載水色山容猶未  
改竹際無人泉自鳴巖前片石雲長在老僧茆  
蓮獨種魚隊隊桃花色不如已斲懸崖成佛像

更分澗水注園蔬我來躊躇不得語欲吊遺蹤  
向何所山僧送客雲出門目斷西湖采蓮女

一片雲石

風篁嶺半孤峰斜觚稜剝蝕青苔花  
出神鬼便覺氣勢生烟霞突兀排空色欲墮玲  
瓏長有雲飛過夜半頭陀乞米歸疑是老龍當  
道卧

大水謠一首

丙申歲  
吳興作

黑風吹浪翠蛟吼毒霧埋林蒼兕走南山北山

夜發洪人家什九清溪中禾苗腹漲半爛死供  
得公家餓妻子男啼女哭坐黃昏夏稅新征吏  
扣門

去歲五月水暴發臨溪饑民拾菱蕨今年八月  
雨不鮮百川灌城如滄海支祁掣山蜃出地杞  
人但恐天崩墜君不見西北采礦復開河東南  
杼柚今無多

小菴集卷之八

終